

溫熱論箋正

溫熱論

丙辰仲春之月

伊立勳題



溫

熱

論

笺

正

清道人



民國五年五月初版

定價大洋叁角

著作者

寓上海新靶子路一百四十號吟桂

蕭 山 陳 根 儒

路口第二宅洋房電話四千零零三

版權所有
翻印必究

代發行所

上海掃葉山房

外埠分售處

各省大書局

農在農

序

醫者古聖人通神明之德不忍生民罹於五行六沴之患氣而為之術以救其死而遂其生者也。由斯道者必先之以經籍正之以師法廣之以聞見心精力果慎思明辨乃克有濟。醫書如靈素之窮源難經之解經金匱傷寒之證治固已無源不濬無流不通。第詞簡意深不易貫聞。後此著作浩如煙海其膾炙人口者如千金外臺四大家書各極其妙而不善學者每以古方今病多半枘鑿以之治雜病尚可循序研究以之治時邪伏氣則朝夕變遷安危反掌可不求之有素乎。吾吳葉天士先生才長學博洞貫古今所著如本事方釋義景岳發揮醫案存真醫效秘傳及手批書皆極精當。又及門所編臨證指南雖非盡出自先生手訂而精義所在實先生有以啟之其尤切時用者莫如先生口授溫熱病各法相傳謂於舟次所錄及門傳鈔不無遺漏失序。後人編注如溫熱經緯溫熱贅言及吳醫

彙講所載雖曲暢旁通猶未盡蘊奧今陳君根儒觀察復以溫熱一編彙
集精要貫以己意為之箋正補當時之闕漏作後學之楷模書成問序於
余余受而讀之服其好學之專得師之正而濟人利物之心無窮已也余
老不言醫自丁未奉 召入都戊申因病假歸杜門養疴幾及十年學殖
荒落愧無所得今讀是書不禁怦怦心動而幸論溫熱者之得所指歸也
謬序於首以誌欽服並希速付梨棗以餉海內是亦君子學道愛人無已
之心也夫丙辰春初古吳曹元恒智涵甫識于蘭雪書屋

序例

早歲多病。讀書之暇。偶檢方書。得陳修園見其書之多。以為其學之博也。從而討焉。則支離穿鑿。剽竊而成者也。復得徐靈胎。其學固遠勝修園。然其言亦有驗有不驗。繼乃盡啟所藏。得素問仲景以下書數千卷。凡論傷寒者。靡不覽焉。而所見愈繁。所疑愈多。若涉大海。其無津涯。則又何所折衷也。遂棄去不復求。既而思之。古之良醫。如周之扁鵲。倉公。秦之和緩。漢之淳于意。華陀之流。其著述絕見於世。華陀與仲景同時。當時華陀之名藉甚。仲景無所聞。其書晚乃稍出。華陀中藏經寥寥數冊。人且無知者。然則經驗多與術之神者。或未必能著書。其著書者。類皆窮愁無聊。閉門造車。未能合轍者也。比官吳下。聞吳人言葉天士甚詳。其術頗奇。而可思求。其書得其門人所述。臨證指南。醫效秘傳。數種。固所習見者。然試其術有驗。益求其精。乃知其學實本餘杭陶氏。旁及東垣子和。丹溪。遠紹河間。而

得其正。故能力闢餘子。於溼溫治法。獨舉標準。非嘉言景岳諸人所能及。余平日之所疑者。亦一旦豁然貫通。而得其所宗。嗟乎。五運六氣。萬變無窮。生民之疾。甯有盡時。捫燭求日。其於光也。固已遠矣。比來箋註河間原病式。頗識此意。而因病施治。輒亦獲效。階梯所自。實賴葉氏。其先知先覺。繼往開來者。歟。惜其未暇著書。微言奧旨。僅散見於本草經註。景岳發揮。及所批陶氏全生集。女科經綸。柯氏傷寒金匱。與醫衡等書者。人多忽諸。而本事方釋義。絕少精意。猶恐為後人所託。至其門人學識未逮。多墨守所習。不能啟問。盡其所長。闡其所闕。演其緒者。又皆聞一知一。莫能會通。遂使百有餘年。其風漸微。其道將墜。心甚憫之。輒於暇時。即王士雄氏溫熱經緯所注溫熱篇。為考訂舊聞。正其謬誤。循流溯源。務使曲暢旁通。各極其趣。片言隻字。必折其衷。不敢妄逞己意。沈潛反覆。蓋亦有年。名曰溫熱論箋正。箋葉氏之旨。而正諸家之失也。然余之所學。亦閉門造車者。其

與諸人相去幾何。且著書誤人。古人所戒。醫書尤甚。脫有不慎。後世宗之。貽禍無窮。是以數年以來。偶有所述。未嘗示人。滄桑之變。與吾友李道士同居滬濱。道士鬻書而吾鬻醫。窮困相同。寓居相接。時相往來。偶論溫病。及于此書。道士謂自闕其術。與貽誤後學。其罪相等。因錄寫一通。復質之吾友曹滄洲部郎。部郎今之國工。不以為非。且序之。今速梓以問世。乃付石印。世有好學深思之士。匡余不逮。實所願望。舉例如左。

一此篇相傳。天士遊洞庭山。門人顧景文於舟中記當時所聞之語。其後及門傳鈔。遂顛倒錯亂。世所傳者。出華岫雲唐三烈兩人。唐氏分二十章。章虛谷註。悉依唐本。王孟英溫熱經緯。改從華本作二十章。自謂依原論次序。按原本既非天士手定。舟中閒話。偶然論及。本無次序可循。今悉從病情原變。治法次第。列為先後。刪其繁亂者三十八字。都為一卷二十四節。三千六百七十九字。

溫熱論卷上 序例
一此篇註釋諸家之說有可採者首舉其名其後參以己意或更有辨正者加按字以別之其於正義之外有足相發明者加○以別之

一遇論中宜用某某等藥輒詳註其藥性於下其云某丸散湯亦將其方詳註如云宜用某法則採前人經驗之方附錄于后以便學者間有未錄如承氣湯等以盡人皆知也

一原文頂格大書註低一格溫熱經緯已有先例茲編仍之

一所據原文係從醫要秘傳陸氏所輯者各本互有增損之處並採註于下

一所採諸家之說有舉其名有僅舉其氏與其書者當時隨筆偶錄故未一律以無關宏旨仍之

一原文與註並加點以分句讀者讀之目力亦治經之盛事也

昔淳于氏有言人之所病病病多醫之所病病方少而吾以為今之醫者

却病方多。夫人之受病。猶白之受采。采五而已。然染者和之。則千變萬化。雖有智巧。莫知所窮。人之肢體臟腑。有定而外之。有五運六氣之感。內之有飲食男女七情之傷。稟有強弱。地有高下。氣有變遷。則其為病。雖有聖人。又惡能盡之。以無盡之病。應之以有定之方。此執方治病者。所以鑿枘不入也。論者不察。以為今人識淺。不能用古方。豈知古今之病。不復同也。自來著書者。喜多著方論。自炫其巧。入主出奴。反覆辨難。自欺欺人。貽誤後學。莫之為甚。夫病態萬狀。病情則一。執簡御繁。自有至理。內經論病。河間著原病式。皆提綱挈領。不立一方。葉氏宗之。故於論中。亦止言宜用某某等藥。不立成方。此其天資高邁。學術純粹。非宋元以後作者可及。昔聖人作易。以象萬物。不能盡圖萬物於易之中。亦此道也。學者苟能潛心本論。博覽古今之籍。窮源竟委。以期至於古人之域。則處病立方。得心應手。自有左右逢源之妙。奚事綴拾成方。奉為枕秘乎。此余箋論而不補方之

意特揭之以告學者乙卯冬至日贅道人識

溫熱論箋正

長洲葉桂天士述

蕭山陳光祚根儒箋正

吳縣曹元恒智涵全男岳鎮南笙鑒定

溫邪上受首先犯肺逆傳心包

逆傳二字紛紛聚訟章虛谷謂肺邪反傳於心金不畏火為逆王孟英以難經從所勝來為微邪駁之因引下文三焦不得從外解必致成裏結句謂由上焦氣分以及中下二焦者為順傳以邪從氣分下行為順入營分內陷為逆苟無其順何以為逆按逆傳二字見於陶氏全生集傷寒傳足不傳手經論云陽邪傳衛陰血自燥熱入膀胱壬病逆傳於丙葉氏逆傳之說當本諸此以肺與膀胱同主表也章王二註均非且病以退為順進為逆由內達外為順由外入內為逆溫邪由衛入營故云為逆若三焦不得從外解致成裏結由因循誤治所致由外入裏豈

得謂順。王氏之說尤為強辨。又按葉氏醫案。幼科風溫中。有足經順傳。如太陽傳陽明。肺病失治。逆傳心包。絡之語。尤徵其說出於陶氏。蓋以邪歸胃腑。可下而愈為順也。

肺主氣屬衛。心主血屬營。

此兩句。承上文言逆傳心包。不外乎由衛入營也。

辨營衛氣血。雖與傷寒同。若論治法。則與傷寒大異也。

此承上文。因言溫病傷寒之異治。以起下文也。

蓋傷寒之邪。留戀在表。然後化熱入裏。溫邪則熱變最速。

吳鞠通氏謂傷寒傷人身之陽。由毛竅而谿。由谿而谷。由谷而孫絡。由孫絡而大絡。由大絡而經。始太陽。終厥陰。曲折而入。故曰留戀在表。然後化熱入裏。溫邪犯肺。即傳心包。上焦不治。便入中焦。中焦不治。即傳下焦。傷人之陰最易。故曰熱變最速。

未傳心包邪尚在肺肺主氣其合皮毛故云在表

吳鞠通氏謂傷寒由毛竅而入自下而上始足太陽足太陽膀胱屬水寒即水之氣同類相從故病始於此古來但言膀胱主表殆未盡其義肺者皮毛之合也獨不主表乎又謂人身一臟一腑主表之理人皆習焉不察以三才大道言之天為萬物之大表天屬金人之肺亦屬金肺主皮毛經曰皮應天天一生水地支始於子而亥為天門乃貞元之會人之膀胱為寒水之腑故俱同天氣而俱主表也

在表初用辛涼輕劑挾風則加入薄荷牛蒡之屬挾溼加蘆根滑石之流或透風於熱外或滲溼於熱下不與熱相搏勢必孤矣

此明溫邪初起未傳營者之治法蓋溫邪為病必有所挾不外風與溼之兩途風陽邪宜表而出之故曰透外溼陰邪宜分而利之故曰滲下不爾風挾溫熱而燥生清竅必乾謂水主之氣不能上榮兩陽相劫也溼

與溫合。蒸鬱而蒙蔽於上。清竅為之壅塞。濁邪害清也。

此明當透風熱外。滲溼熱下。不使與熱相搏之故。章虛谷謂胃中水穀。由陽氣化生津液。故陽虛而寒者。無津液上升。停飲於胃。遏其陽氣。亦無津液上升。而皆燥渴。仲景已備論之。此言風熱兩陽邪。劫其津液而成燥渴。其因各不同。則治法迥異也。至風雨霧露之邪。受於上焦。與溫邪蒸鬱。上蒙清竅。如仲景所云。頭中寒溼。頭痛鼻塞。納藥鼻中一條。雖與溫邪蒙蔽相同。又有寒熱不同也。按此條明風溫溼溫俱有清竅乾塞。分哲言之。恐人以傷寒之法誤治。尤恐以溼溫之濁邪害清。與風溫之兩陽相劫混治也。

其病有類傷寒。其驗之之法。傷寒多有變證。溫熱雖久。在一經不移。以此為辨。

傷寒傳經。故多變證。溫邪只在三焦營衛。故曰不移。

右第一節首論傷寒溫熱感受證治之不同。溫病有挾風挾溼之異治。其所入之途。有衛氣營血之次第。總舉其綱。以告學者。下文乃詳言之。前言辛涼散風甘淡驅溼。若病仍不解。是漸欲入營也。營分受熱。則血液受劫。心神不安。夜甚無寐。或斑點隱隱。即撤去氣藥。如從風熱陷入者。用犀角竹葉之屬。如從溼熱陷入者。犀角花露之品。參入涼血清熱方中。若加煩躁。大便不通。金汁可以加入。老年或平素有寒者。以人中黃代之。急透斑為要。

此明溫邪初傳心包之候。而出其治也。心包主血。代心用事。故邪入營。血心包受之。以致心神不安。夜甚無寐。斑屬血。疹屬氣。此營分受熱。故言斑不言疹。若見疹則無關營血。即下文所謂當理氣分之邪矣。犀角苦酸鹹寒。涼心瀉肝。清胃中大熱。祛風利痰。辟邪解毒。治傷寒時疫發黃發斑。吐血下血。畜血發狂。痘瘡黑陷。消癰化膿。定驚明目。故為治斑